

Molaodi wa khampani o ahloletswe boqhekanyetsi ba PAYE

Tshwane, 27 Phupu 2021 – Khampani le molaodi wa yona ba fumanwe ba le molato wa boqhekanyetsi ba ho etsa ditseko tsa leshano tsa khrediti ya Lekgetho la Lefa ha o ntse o fumana moputso (PAYE) tsa R 5.7 million.

Diphuputso tse entsweng ke dioditara tsa Ditshebeletso tsa Lekgetho tsa Afrika Borwa (SARS) di fumane hore PAYE eo e seng ya nnete e ile ya nyehelwa ho tima sekoloto sa lekgetho sa boleng ba R5.6 million. Khrediti ena ya PAYE e ile ya hanwa ke dioditara tsena tsa SARS.

Khampani e bitswang YB Mashalaba and Associates (Pty) Ltd le molaodi wa yona e leng Mong. Yandisa Bavulele Mashalaba ba iphumane ba le molato mane Lekgotleng la Lebatowa la Bloemfontein.

Khampani e ile ya fumantshwa kotlo ya R 100 000 e ileng ya fanyehwa nako ya dilemo tse 5 kaofela, ha molaodi yena a ile a fumana kotlo ya tjhelete e kana ka R 500 000 kapa ho hlola tjhankaneng nako ya dilemo tse 5 eo le yona e fanyehilweng kaofela nako e kana ka dilemo tse 5.

Khomishenara ya SARS Edward Kieswetter o boletse hore dikhampani le balaodi ba tsona ba tla tobana le botjhotjhisi ba tsa bonokwane ebang ba iphapanya le molao le ho leka ho qhekanyetsa mokotla wa mmuso tjhelete efe kapa efe e loketseng ho ka fumanwa ke mmuso.

“SARS e tla thatafalletsa le ho etsa hore ditjeo e be tse hodimo bakeng sa molefalekgetho ofe kapa ofe ya ikemiseditseng ho iphapanya le molao ka boomo ka ha re lebelletse hore molefalekgetho ka mong a ikobele boitlamo ba hae ba lekgetho mmoho le ho lefa kabelo ya hae e seng leeme ya lekgetho,” o boletse jwalo.